

PUSELETSO

YA EFANGELE YA GA JESO KERESETE





MODIMO KE RARA WA GAGO YO O KWA LEGODIMO YO O LERATO

Modimo ke Rara wa gago wa Legodimo. O go itse tota ka sebele e bile o go rata go feta jaaka o ka tlhaloganya. O batla gore o itumele mo botshelong jo le ka bosakhutleng.

Go fitlhelela maikaelelo a, Rara wa Legodimo o file thulaganyo e e bidiwang ya **efangele*** ya ga Jeso Keresete. Jeso Keresete ke Morwa Modimo; botshelo jwa Gagwe le dithuto ke kaedi go isa kagisong mo botshelong jo le boitumelo mo bosakhutleng.

Rara wa rona wa Legodimo o tlisitse gape—puseletso—boammaaruri jwa selegodimo jo o ka bo ithutang le go botshela. Boammaaruri jo bo senoletswe go baporofiti go tswa kwa tshimologong.

EFANGELE E SEGOFATSA MALWAPA LE BATHO

Efangele ya ga Jeso Keresete e segofatsa botlhe bao ba e amogelang le go e tshela. Nngwe ya mafelo a a botoka thata go ruta le go diragatsa efangele ke mo malwapeng. Modimo o tlhomile malwapa go tliša boitumelo go bana ba Gagwe, go re letlelela go ithuta melawana e e siameng mo seemong sa lorato, le go re baakanyetsa go boela kwa go Ene morago ga re sena go tlhokafala. Le ntswa nako dingwe botsalano jwa lelwapa bo ka nna kgwetlho, Rara wa Legodimo o re segofatsa fa re leka go sala morago dithuto tsa ga Jeso Keresete. Dithuto tse di re thusa go nonotsha malwapa a rona.

RARA WA LEGODIMO O SENOLA EFANGELE YA GAGWE

Jaaka karolo ya thulaganyo ya Gagwe, Modimo o tlhopha baporofiti, jaaka Atamo, Aborehama, le Moshe. Baporofiti:

- Ba ruta ka Modimo e bile ke basupi ba ba kgethegileng ba Morwa wa Gagwe, Jeso Keresete.
- Ba amogela **tshenolo**, kgotsa tshupegetso go tswa go Morena.
- Ba ruta lefatshe efangele le go ranola lefoko la Modimo.

*Mafoko a mashibidu a tlhalosiwa mo ditsebeng 18 le 19.

Baporofiti ba amogela **boperesiti**, kgotsa taolo go buwa le go dira mo leineng la Modimo go etelela bana ba Gagwe. Batho ba ba salang morago baporofiti ba amogela masego ao Modimo a a solo-feditseng. Bao ba ba ganang efangele le baporofiti ba Modimo ba latlhegelwa ke masego ao e bile ba ikatolosa kgakala le Modimo. Bao ba ganang baporofiti le go tlogela maitlamo a bone a go sala Modimo morago ba mo seemong se se bidiwang **boitimokanyi**.

***B**oammaaruri jo bo senotsweng bo a latlhega fa batho ba gana baporofiti.*

Le fa gone bana ba Gagwe ba bantsi ba boeletsa go mo gana le baporofiti ba Gagwe, Rara wa Legodimo o tswelletse ka go rata bana ba Gagwe. O batla go re neela sengwe le sengwe se re se tlhokang

go itumela jaanong le go boela go Ene fa re tlhokafala. Dikwalo tse di Boitshepo di senola se kaelo ya Modimo e se boeleditseng go tswelera go bana ba Gagwe, le fa re sa reetse ka metlha:

- Modimo o tlhophisa moporofiti.
- Moporofiti o ruta batho efangele le go etelela batho.
- Modimo o segofatsa batho.
- Batho ka bonya ka bonya ga ba tseyetsia kgotsa ga ba obamele dithuto tsa moporofiti. Kgabagare ba gana moporofiti le dithuto tsa gagwe mme ba wela mo boitimokanying.
- Ka ntlha ya boitimokanyi, batho ba latlhegelwa ke kitso ya efangele. Tetla ya boperesiti e tsewe mo gare ga bone.
- Fa nako e siame e bile batho ba ipaakanyeditse go Mo sala morago gape, Modimo o tlhophisa moporofiti yo mongwe, a bu-setsetse boperesiti le Kereke, mme a supegetse moporofiti go ruta efangele.

Mafoko a mashibidu a tlhalosiwa mo ditsebeng 18 le 19.

Baporofiti ba Kgolagano e e Kgologolo ba kwadile mafoko a Modimo.





JESO KERESETE O SIMOLODISITSE KEREKE YA GAGWE

Go tswa nakong ya Tlholego, bana ba Modimo ba ne ba lebeletse pele go tla ga Mmoloki Jeso Keresete. Jaaka a solofeditse, Rara wa Legodimo o rometse Morwa wa Gagwe, Jeso Keresete, mo lefats'heng go feta dingwaga tse di sekete tse pedi tse difitileng.

Jeso Keresete o tshidile a sena sebe, botshelo jo bo itekanetseng ka botlalo. O simoloditse Kereke ya Gagwe, a ruta efangele ya Gagwe, mme a dira dikgagamatso tse dintsi.

O ne a tlhophisa banna ba ba lesome le bobedi go nna **Baaposetole, ba Gagwe** go balelwa Petero, Jakobe, le Johane. A ba ruta le go ba neela taolo ya boperesiti go ruta mo leineng la gagwe le go dira **ditlhom**o tse di boitshepo, jaaka **kolobetso**.

Fa Jeso a simolodisa Kereke ya Gagwe, O ne aamogetse ditaalo go tswa go Rara wa Legodimo. O ne jalo a laela barutwana ba Gagwe. Jeso o rutila ba Gagwe ba ba mo salang morago gore tshenolo go tswa go Modimo ke lentswe le A ka agang Kereke ya gagwe mo go lone.

Kwa bokhutlong jwa Botshelo jwa Gagwe, Jeso Keresete a boga le go swela dibe tsa mongwe le mongwe yo o tshedileng kgotsa yo o tla a tshelang mo lefats'heng. Setlhabelo se se bidiwa **Tefo**. Ka go boga ga Gagwe, loso, le **Tsogo ya baswi**, Mmoloki o dirile gore go kgonegale gore re itshwarelwe. Bao ba nang le tumelo mo go Ene, ba ikotlhaya, le go tshegetsisa ditaalo tsa Gagwe ba fiwa boitshwarelo jwa dibe mme ba tlatswa ka kagiso le boitumelo.

Morago ga Tsogo ya baswi ya Gagwe, Jeso Keresete o ne a wkaela Baaposetole ba Gagwe ka tshenolo. Baebela e supa ditsela tse

Jeso Keresete o rulagantse Kereke ya Gagwe:

- *O ne a bitsa le go tlhoma Baaposetole.*
- *O ba neetse tetla ya Gagwe go ruta le go kolobetsa. Tetla e e bidiwa boperesiti.*
- *Morago ga loso la Gagwe le Tsogo ya baswi, A tswelela ka go kaela Baaposetole ka tshenolo.*

Mafoko a mashibidu a tlhalosiwa mo ditsebeng 18 le 19.

Jeso o file boperesiti go Baaposetole ba Gagwe.

dintsi tse A tswelentseng ka go kaela Kereke ya Gagwe (bona Ditiro 10; Tshenolo 1:1). Ke moo Kereke ya ga Jeso Keresete e neng e eteletswepele ke Modimo mme e seng ke batho.

BOITIMOKANYI JO BOGOLO

Morago ga loso la ga Jeso Keresete, batho ba ba boikepo ba kgerisa le go bolaya maloko a mantsi a Kereke. Maloko mangwe a kereke batswa mo melawaneng e e rutilweng ke Jeso Keresete le Baapose-tole ba Gagwe. Baapose-tole ba ne ba bolawa, mme taolo ya bopere-siti—go akaretsa dilotlele tsa go kaela le go amogela tshenolo ya

Kereke—di ne tsa tsewa mo lefatsheng. Ka ntlha ya gore Kereke e ne e sa tlhole e eteletswepele ka taolo ya boperesiti, ga tsena phoso mo dithutong tsa Kereke. Batho ba ba molemo le boammaaruri jo bontsi tsa sala, mme efangele jaaka e

Ka loso la Baapose-tole ba ga Jeso Keresete, boammaaruri bone jwa latlhega gape.

ne e simolodisitswe ke Jeso Keresete ya latlhega. Nako e e bidiwa Boitimokanyi jo Bogolo.

Boitimokanyi jo jwa tswela mo go dirweng ga dikereke tse dintsi ka dithuto tse di gotlhogotlhanang. Ka sebaka seo, banna ba bantsi le basadi bane ba batla boammaaruri, mme ba seka ba bo bona. Batho bale bantsi ba ba siameng ba dumela mo Modimong le Jeso Keresete mme ba leka go thaloganya le go ruta boammaaruri, mme ba ne ba sena efangele ka botlalo kgotsa taolo ya boperesiti. Maduo ya nna gore, losika lengwe le lengwe la rua seemo sa boitimokanyi jaaka batho bane ba rotloediswa ke se losika le leftileng lo se fitisi-tseng, go akaretsa le diphetogo go efangele ya ga Keresete.

Batho bangwe ba ba tlhotlheleditsweng, jaaka Martin Luther le John Calvin, ba lemoga gore ditirego le dithuto di ne di fetotswe kgotsa di latlhegile. Ba ne ba leka go tokafatsa dikereke tse baneng ba di tsena. Fa go sena taolo ya boperesiti, le fa go ntse jalo, efa-ngele ya ga Keresete ga e kgone go boeledisiwa mo popego ya yone ya ntlha. **Puseletso** e ne e tlhokega.

Modimo o ne a itsile gore go tla a
nna le boitimokanyi. Ka moporofiti wa
Kgologano e Kgologolo, O ne a re:

*“Bonang, matsatsi a e tla . . . a gore Ke tla
a romela leuba mo lefatsheng, e seng leuba
la dijo, kante lenyora la metsi, mme la
go utlwa mafoko a Morena:*

*“Mme [batho] ba tla a etsaetsega go tswa
lewatleng go ya lewatleng, le go tswa
bokone le gone go ya botlhaba, ba tla a
taboga kwa le le kwa ba senka lefoko la
Morena, mme ga ba kake ba le bona.”*

Amose 8:11–12



PUSELETSO YA EFANGELE

Ka 1820, jaaka A dirile go yeng ka ditso, Rara wa Legodimo gape a tlhophha moporofiti go buseletsa efangele le boperesiti mo lefatsheng. Leina la moporofiti yo o ke Joseph Smith. Jaaka monna yo o mmotlana, Joseph o ne a tsiediwa ke di pharologanyo ma gareng ga dikereke tse dintsi mo kgaolong ya gagwe mme a batla go itse gore ke kereke efeng e siameng. A itse gore o tlhoka tlhalefo, a sala morago kgakololo e e tswang mo Baebeleng, “Fa mongwe wa lona a tlhoka tlhalefo, a a kope Modimo, yo o fang batho botlhe ka tshosologo, e bile a sa ba bone phoso; mme o tla a mo fa” Jakobe 1:5

Joseph Smith a swetsa ka go botsa Modimo gore ke a direng. E ne ya re fa Joseph a rapelela go itse boammaaruri, Rara wa Legodimo le Jeso Keresete ba iponagatsa go ene. Jeso o ne a bolelela Joseph gore a seka a tsena dikereke dipe, gone “tsotlhe di ne di se nnete” e bile “ba ne ba atumela gaufi le nna ka dipuonama tsa bone, mme dipelo tsa bone dikgakala le nna, ba ruta dithuto le melao ya batho, ba na le sebopego sa bomodimo, mme ba ganetsa thata ya teng” (Joseph Smith—History 1:19).

Jaaka Modimo a ne a dirile ka Atamo, Nowa, Aborehama, Moshe le baporofiti ba bangwe, O ne a bitsa Joseph Smith go nna moporofiti yoo ka ene efangele e e feletseng e neng ya buselediwa.

Joseph Smith o ne a bona Rara wa Legodimo le Jeso Keresete. Ka maitemogelo a, o ne a re:

“Ke ne ka bona pilara ya lesedi mo godimo ga tlhogo ya me, go feta phatsimo ya letsatsi, e e neng e fologelela ka bonya ka bonya go fitlhelela e wela mo go nna. . . .

Fa lesedi le sena go wela go nna Ke ne ka bona Batho ba babedi, bao phatshimo le kgalalelo ya bone e neng e gaisa tlhaloso tsotlhe, ba eme godimo game mo phefong. Mongwe wa bone a bua le nna, a mpitsa ka leina mme a re, a supa yo mongwe—

Yo ke Morwaaka yo o Rategang. Mo Utlwe!”

Joseph Smith—History 1:16–17

Puseletso ya Boperesiti

Ka 1829, Joseph Smith o ne a amogela taolo ya boperesiti e e tshwanang le e Jeso Keresete a e neetseng baaposetole ba Gagwe. Johane wa Mokolobetsi, yo o kolobeditseng Jeso, o ne a iponagatsa go Joseph Smith mme a mo naya **Boperesiti jwa ga Arone**, kgotsa boperesiti jo bo kwa tlase. Petoro, Jakobe, le Johane (Baaposetole ba bararo ba ntlha ba ga Jeso Keresete) morago ba iponagatsa go Joseph Smith mme ba mo neela **Boperesiti jwa ga Melekhesedeke**, kgotsa boperesiti jo bo kwa godimo.

Morago ga a sena go amogela taolo ya boperesiti, Joseph Smith o ne a laelwa go rulaganya Kereke ya ga Jeso Keresete gape mo lefatsheng. Ka ene, Jeso Keresete gape o ne a bitsa Baaposetole ba ba Lesome le Bobedi.

Jeso Keresete o ne a romela Johane wa Mokolobetsi le Baaposetole ba Gagwe ba bararo go fa Joseph Smith taolo ya boperesiti.

Fela jaaka Jeso Kereste a ne a eteletsepele Baaposetole ba Gagwe ka tshenolo morago ga Tsogo ya baswi, O tswelela ka go kaela Kereke gompiano ka baporofiti ba ba tshelang le baaposetole. Moporosidente wa Kereke ya ga Jeso Keresete ya Baitshepi Ba-Malatsi a Bofelo ke moporofiti yo o tlhophilweng wa

Modimo gompiano. Ene, bagakolodi ba Gagwe, le Baaposetole ba ba Lesome le Bobedi ba tshegetsatsa taolo ya boperesiti e e tshageditsweng ke botlhe baporofiti le baaposetole ba dinako tse di fitileng. Banna ba ke baporofiti, balebi, le basenodi.

Mafoko a mashibidu a tthalosiwa mo ditsebeng 18 le 19.

Petoro, Jakobe, le Johane—Baaposetole ba ga Jeso Keresete—ba filwe Boperesiti jwa ga Melekhesedeke go Joseph Smith.





BUKA YA GA MOMONE

Jaaka ele karolo ya Puseletso ya efangele, Modimo o tlisitse go ya pele Buka ya ga Momone: Bosupi jo Bongwe ka ga Jeso Keresete

Ka thata ya Modimo, Joseth Smith o ranotse buka e go tswa go pego tse di kwadilweng tsa bogologolo tsa dipape-tlana tsa gauta. Buka ya ga Momone Ke “pego ya Modimo’ ya kamano ya gagwe le banni ba bogologolo ba Maamerika e bile e nale efangele ka botlalo ya bosenang phelelo” (ketapele ya Buka ya ga Momone).

Buka ya ga Momone ke bopaki jo bothata jwa ga Jeso Keresete. E re thusa go tlhaloganya dithuto tsa Gagwe, go akaretsa le tse di mo Baebeleng.

Buka ya ga Momone ke bosupi jo bo dumelesegang jwa Puseletso ya efangele ka Joseph Smith. O ka itse ka bo wena gore Buka ya ga Momone e boammaaruri. Go amogela kitso e, o tshwanetse go e bala, go tlhatlhanya molaetsa wa yone, le go eletsa go itse gore a e boammaaruri. O tshwanelwa ke go botsa Rara wa Legodimo go go tlhomamisetsa gore a ke lefoko la Gagwe. Fa o dira jalo, O tla a go senolela ka **Mowa o o Boitshepo** gore e boammaaruri.

Fa o tla go itse gore Buka ya ga Momone e boammaaruri, o tla itse gape ka Mowa o o Boitshepo gore Joseph Smith e ne e le moporofiti wa Modimo, gore efangele ya ga Jeso Kereste e ne ya buselediwa ka ene, le gore Kereke ya ga Jeso Keresete ya Baitshepi Ba Malatsi a Bofelo e eteletsewe ke moporofiti le baaposetole gompieno.

O ka itse gore se baanamisa efangele ba se rutileng se boammaaruri fa o bala le go rapela ka Buka ya ga Momone:

“Fa o ka botsa ka bopelontle, ka tlhwaafalo, o na le tumelo mo go Keresete, o tla a go supegetsa boammaaruri jwa yone go wena, ka thata ya Mowa o o Boitshepo.

“Mme ka thata ya Mowa o o Boitshepo o ka itse boammaaruri jwa dilo tsotlhe.”

Moronae 10:4-5

NKA ITSE JANG?

O ka itse gore molaetsa o o boammaaruri. Fa o botsa Rara wa gago wa Legodimo ka thapelo, o ka amogela karabo mo go Ene ka Mowa o o Boitshepo. Mowa o o Boitshepo gape o bidiwa Mowa wa Modimo, e bile nngwe ya ditiro tsa Gagwe ke go fa bosupi, kgotsa go paka boammaaruri.

Ke Rapela Jang?

- *Buisa Rara wa gago wa Legodimo.*
- *Bua maikutlo a gago a pelo(malebogo, dipotso, dikopo go tlhomamisa gore a Buka ya ga Mone e boammaaruri le seo baanamisa efangele ba se rutileng).*
- *Tswala ("Mo leineng la ga Jeso Keresete, amene").*

Kitso e e ka gakgamatsa e bile e fetola botshelo, mme e tla ka metlha jaaka ele thurifatso e e didimetseng, e sena pontsho e kgolo ya thata ya Modimo. Mowa o o Boitshepo o tlhomamisa boammaaruri ka maikutlo, dikakanyo, le mego-polo. Jaaka go rutilwe mo Baebeleng, "Maungo a Mowa ke lorato, boipelo, kagiso, boitshoko, bokgwabo, bosiami, tumelo, bonolo, [le] boitshwaro" (Bagalatia 5:22–23). Maikutlo aa tswang go Mowa o o Boitshepo ke tshenolo ka bonosi go wena gore efangele ya ga Jeso Keresete e tsosolositsweng ka Joseph

Smith e boammaaruri. O tla re jalo o tlhoke go itlhophela gore ao tla a tshela mo kagisong le kitso e o e amogetseng.



MOLA WA DITHEME

Boperesiti jwa ga Arone Boperesiti jo bo kwa tlase. Boperesiti jo bo akaretsa taolo ya go kolobetsa mme bo biditswe ka Arone mo Kgologano e Kgologolo ya Baebele.

Boitimokanyi Fa batho, Kereke, kgotsa ditshaba tsotlhe di tlogela kgotsa di tswa mo efangeleng ya ga Jeso Keresete. Maduo a boitimokanyi ke kgaogano, tsietsego, le go latlhegelwa ke taolo ya boperesiti, kgotsa tshiamelo ya go dira mo leineng la Modimo.

Moaposetole Setlhogo se Jeso Keresete a se fileng banna ba ba lesome le bobedi ba A ba tlhophileng jaaka badiramongo ba ba gaufi ba Gagwe ka nako ya bodiredi jwa Gagwe mo lefatsheng e bile bao a ba neetseng taolo go dira mo leineng la Gagwe. Mo dinakong tsa segompiano, Jeso Keresete o biditse banna ba bangwe go dira jaaka Baaposetole ba Gagwe. Jaaka mo dinakong tse di fitileng, Moaposetole ke mosupi yo o kgethegileng wa ga Jeso Keresete e bile o nale taolo go tswa go Ene.

Tefo Tiragalo e e re letlelelang go ikagisanya le Modimo. Go lefa ke go bogelela melato ya boleo, ka jalo e ntsha ditlamorago tsa sebe go tswa mo moleofing yo o ikwatlhayang. Jeso Keresete e ne e le ene ka esi a ka kgonang go dira Tefo e e itekanetseng ka botlalo ya batho botlhe. Tefo ya ga Gagwe e ne e akaretsa go bogela dibe tsa rona, go tshololela madi a Gagwe, le loso la Gagwe le Tsogo ya baswi. Ka ntlha ya Tefo, mongwe le mongwe yo o a tshedileng o tla a tsosiwa mo baswing. Tefo gape e re tlamela ka tsela ya go itshwarelwa dibe le go tshela go ya goile le Modimo.

Kolobetso Tsela e e botlhokwatlhokwa ya go amogela go itshwarelwa dibe. Ka kolobetso le tlhomamiso ka taolo ya boperesiti, re nna maloko a Kereke ya ga Jeso Keresete ya Baitshepi ba Malatsi a Bofelo. Kolobetso ke ka go nwetswa, e raya gore motho yo o kolobediwang o tsenngwa a khurumeditswe ke metsi ka bo khutshwane. Kolobetso e supa keletso ya rona ya go sala sekao sa ga Keresete morago le go dira dikgologano le Modimo.

Efangele Thulaganyo ya Rara wa Legodimo go re thusa go nna le kagiso mo lefatsheng le boipelo ka bosakhutleng. Efangele e remeletse mo Tefong ya ga Jeso Keresete mme e batla gore re nne le tumelo mo go

Ene, re ikotlhae, re kolobetswe, re amogele Mowa o o Boitshepo, le go itshoka go ya bokhutlong.

Mowa yo o Boitshepo Gape o bidiwa Mowa o o Boitshepo, Mowa wa Modimo, le Mogomotsi. Ke mosupi, kgotsa o fa bopaki, jwa ga Rara wa Legodimo le Jeso Keresete e bile o senola le go ruta boammaaruri.

Boperesiti jwa ga Melekhesedeke Boperesiti jo bo kwa godimo kgotsa jo bogolo. Bo biditswe ka Melekhesedeke mo Kgolaganong e Kgologolo ya Baebele, yo o e neng e le moperesiti yo mogolo wa mosiami e bile e le kgosi.

Tlhommo Tiro semmuso e e diragadiwang ka boitshepo, eka taolo ya boperesiti. Sekai ke kolobetso.

Boperesiti Taolo le thata ya Modimo. Modimo o neela monna thata e go dira mo leineng la Gagwe. Boperesiti jwa ga Arone bobuseditswe go Joseph Smith ke Johane wa Mokolobetsi, yo o a kolobeditseng Jeso. Boperesiti jwa ga Melekhesedeke bone bo buseditswe ka Petoro, Jakobe, le Johane, Baaposetole ba bararo ba ga Jeso mo go ba ba Lesome le Bobedi.

Puseletso Go dira sengwe jaaka se ne se ntse; go se simolodisa; go se tliša gape sesha. Morago ga boammaaruri le taolo di sena go latlhega go tswa mo lefatsheng, efangele e ne ya buselediwa ka moporofiti Joseph Smith. Puseletso e farologanye le go fetola ka jaana go *fetola* go raya go baakanya mokgatlho yo o leng teng kgosa tirego e le maiteko a go e buseletsa mo seemong sa yone sa pele, fa gone go *buseletsa* go raya go simolodisa kgotsa go ntshafatsa mokgatlho kgotsa tirego mo go feletseng.

Tsogo ya baswi Morago ga loso la senama, go boelana ga mowa le mmele wa senama le marapo ka botlalo o itekanetse. Jeso Keresete ke ene wa ntlha go tsoga mo baswing.

Tshenolo Puisano ma gareng ga Modimo le bana ba Gagwe, ka gale ke ka Mowa o o Boitshepo. Batho ba ka amogela tshenolo go kaelwa mo matshelong a bone, mme Modimo fela ke e ne a tlhophang moporofiti go amogela tshenolo ya lefatshe lotlhe. Tshenolo e tla ka di tsela tse dintsi, mme gantsi e tla ele dikakanyo, maikutlo le megopolo.

GOITHUTA GA TLALALETSO

Dipotso tse di latelang le Mafoko a tla a go thusa go ithuta thata ka ga melawana mo bukaneng e le go di tlhatlhanya. Mola o ga se gotlhe mo go feletseng; dintlha tse di kwa tlase le referense ya sefa-paano mo Mafokong di tla a go supegetsa metswedi ya tlaletso ya metsamao ya ditemana.

Go raya eng mo go wena gore Modimo ke Rara wa gago wa Legodimo?

Malaki 2:10 (Baebele, Kgolagano e e Kgologolo)

Bahebera 12:9–10 (Baebele, Kgolagano e Ntsha)

Tiro ya moporofiti ke eng? Ke eng go le botlhokwa go itse gore Modimo o buwa le Baporofiti?

Amose 3:7 (Baebele, Kgolagano e Kgologolo)

Jakobe 4:4–6 (Buka ya ga Momone, tsebe 124)

Go raya eng go nna le taolo ya boperesiti? Ke ka jang gore mongwe a ka amogela taolo e?

Mathaio 10:1 (Baebele, Kgolagano e Ntsha)

Johane 15:16 (Baebele, Kgolagano e Ntsha)

Go diragalang eng fa taolo e o e latlhega?

Amose 8:11–12 (Baebele, Kgolagano e Kgologolo)

1 Nifae 13:24–29 (Buka ya ga Momone, ditsebe 25–26)

A Baaposetole ba ga Jeso ba ne ba itse gore boitimokanyi bo tla a direga?

Ditiro 20:28–31 (Baebele, Kgolaganyo e Ntsha)

2 Batheselonika 2:2–3 (Baebele, Kgolaganyo e Ntsha)

2 Timotheo 4:3–4 (Baebele, Kgolaganyo e Ntsha)

Go raya eng go wena gore efangele ya ga Jeso Keresete e buseleditswe ka Joseph Smith?

The Testimony of the Prophet Joseph Smith (bukana)

Buka ya ga Momone ke eng? E fa jang bosupi jwa pitso ya ga Joseph Smith ele moporofiti?

tsebe ya setlhogo sa Buka ya ga Momone

ketapele ya Buka ya ga Momone

Tiro ya Mowa o o Boitshepo ke eng?

Alema 5:45–47 (Buka ya ga Momone, tsebe 221)

Moronae 10:3–5 (Buka ya ga Momone, tsebe 529)

OBAMELA LE RONA

TLAYA O BONE KA FAPUSELETSO
YA EFANGELE E KA SEGOFATSANG
BOTSHELO JWA GAGO KA TENG



Phuthego ya Sakaramente ke konokono ya tirelo ya kobamelo. Gantsi e nna sebaka se sefetang oura go se gonnye le gore e nna ka nako tsotlhe e nale le tse di latelang:

Difela: Diopelwa ke phuthego. (Dibuka tsa Difela di a fiwa.)

Dithapelo: Di fiwa ke beng gae ba maloko a Kereke.

Sakaramente: Senkgwe le metsi di a segofadiwa le go fitisediwa go phuthego e le kgakologelo ya Tefo ya ga Jeso Keresete.

Dibui: Gantsi mongwe kgotsa ba le babedi ba maloko a phuthego ba bo ba filwe go bua ka ditlhogo tsa efangele.

Kapari: Banna le basimane ka karetsa ba apara disutu kgotsa marokgo le hempe le thai. Basadi le basetsana ba apara mesese kgotsa dikete.

Dikabelo ga di kopiwe ka nako ya tirelo ya kobamelo.

Re go laletsa gape gore o tsenelele diphuthego tsa tlaleletso, go yeng ka dikgatlhego tsa gago le setlhopha sa dingwaga tsa gago. Tatlano le boleng teng jwa diphuthego tse bo ka nna jwa farologana.

Sekole sa Sontaga: Ditlelase tsa go ithuta Mafoko le dithuto tsa efangele.

Diphuthego tsa Boperesiti: Ditlelase tsa banna le basimane ba dingwaga tse 12 le go feta.

Mokgatlho wa Thuso: Ditlelase tsa basadi ba dingwa tse 18 le go feta.

Basadi Potlana: Ditlelase tsa basetsana ba ba dingwaga tse 12 go isa go 18.

Poremari: Setlhopha sa tirelo le ditlelase tsa bana ba dingwaga tse 3 go isa go tse 11. Banyana(nursery) go bana ba ba dikgwedi tse 18 go isa ko dingwagang tse 3 kgapetsa kgapetsa e teng.



Nako ya bokopano jwa sakramente: _____

Aterese ya Chapele: _____

Ke ka dira eng?



- Bala Buka ya ga Momone

Padi e e Akanyeditsweng: _____

- Rapelela go itse gore Joseph Smith ene e le moporofiti le gore Buka ya ga Momone ke lefoko la Modimo.
- Tsena kereke.
- Ikemisetse gore a o tla a sala morago Mmoloki ka go kolobediwa. Letsatsi la Kolobetso:

- Etela www.mormon.org gore o ithute thata ka ga efangele ya puseletso ya ga Jeso Keresete.
- Tswelela ka go kopana le barongwa gore o ithute thata ka ga boammaaruri jo Modimo a bo buseleditseng ka baporofiti ba malatsi a segompieno.

Bokopano jo bo latelang: _____

Maina a barongwa le nomore ya mogala:

KEREKE YA GA JESU KERESETE YA BAITSHEPI BA MALATSI A BOFELO

www.mormon.org

Malebo go Batehwantshi

Tsebe ya Ntsha: Kwana e e lathegileng, ka Del Parson. © Del Parson. O seka wa kopa
Tsebe 5: Mo go tseleletseng gotsweng kwa *The Prophet Isaiah Foretells Christ's Birth*, ka Harry Anderson
Tsebe 6: Mo go tseleletseng gotsweng *Christ Ordaining the Twelve Apostles*, ka Harry Anderson
Tsebe 13: Mo go tseleletseng gotsweng *The Restoration of the Melchizedek Priesthood*, ka Kenneth Riley
Tsebe 14: Mo go tseleletseng gotsweng *Jesus Christ Visits the Americas*, ka John Scott

© 2005 ka Intellectual Reserve, Inc. Tetla tsothe di beilwe. Egatisitse mo USA.
Tetla ya Sekgowa: 1/06. Tetla ya go ranola: 1/06 Thanolo ya Puseletso ya ga Jeso Keresete.
Tswana. 01196 763

SETSWANA



4 0201196763 9

01196 763